

Rapport dal president 2021

Stimadas commembras
Stimats commembers,

Cun retard, causa las reglas e prescripziuns da corona vaina pudü lura in gün cumanzar l'on 2021 cun nossas activitats e radunanzas. Diversas sezzüdas e gronda lavur ha dat in prüma lingia la preparaziun ed organisaziun dal di d'aventüra chi ha lura gnü lö als 14 avuost. Pero avant vaina manà tras als 24 lügl nos tir intern. Causa cha offerin in nos tir intern eir als candidats üna passa chi's confà cun l'examen da chatscha vaina das-chü salüdar a raduont 30 tregants. Gronda suotisfacziun fa nossa passa parcuors da chatsch'ota chi'd es gnüda guadagnada da Roman Fadri Bischoff e'l percuros da chatscha bassa chi ha guadagnà Matthias Merz. Pero eir las maestranzas vegnan trattas da bainquants commembers. La maestranza da chatsch'ota es gnüda guadagnada da Mario Duschèn e la maestranza da chatscha bassa ha guadagnà Gian Reto Alini. Quia lessa güsta eir ingrazchar a tuots commembers chi han güdà a manar tras il tir intern a tuot ils partecipants e natüralmaing ün grond grazcha fich als sponsurs chi mettan a disposiziun minch'on üna bella quantità da premis per nos tir.

Als 14 avuost cun ora pompusa vaina lura salüda a bod 100 persunas a nos di d'aventüra. Üna gruppa es partida amo da s-chür vers il mot Tavrü suot la bachetta da Curdin Florineth e Flurin Filli, per contemplar sulvaschina. Ün otra gruppa es statta quella da famiglia ed uffants cun divers posts d'aventüra e lura amo la gruppa da custodi chi ha prastà fich gronda lavur sün las terrassas dals Chomps in S-charl. Eir quist es stat ün success exemplaric ed ils discuors culs partecipants, ma eir las reacziuns in la pressa, saja quai in la Posta Ladina ed in diversas gazettas da chatscha, ans han dat radschun cha da quists evenimaints esa da manar tras plü suvent. Uschè vaina üna gronda pussibilità da preschantar positiv nossa paschiun a la populaziun ed als giasts. Pero tuot quistas activitats cun gronda lavur e discuors positivs vegnan desdrüts cun be ün cas negativ d'ürant la chatscha. Ün artichel il Blick o eir in las medias bastan e no stuvain darcheu cumanzar da nouv a declarer ed argumentar nossa paschiun.... Puchà

Amo avant il cumanzamaint da la chatscha 2021 vaina in nossa radunanza d'utuon, ingio cha no eschan gnüts sco minch'on orientats da nos guargia sulvaschina sur da las novas prescripziuns da chatscha 2021, pudü trar la büs-cha our da tuot ils commembers chi han ramassà la prüma vouta sur 100 büs-chas, plü precis 122 büs-chas cun güdar e tour part a nossas activitats per ils buns d'üna patenta da chatscha bassa, quella es ida ad Adrian Florinett, e per duos buns d'üna mezza patenta da chatsch'ota chi sun gnüdas guadagnadas da Gian Reto Demonti e da Diego Dell Andrino.

La chatscha 2021 es, our da vista da nossa società, passada sainza intops e che chi'd es amo plü important sainza gronds accidaints. Guardà sur tuot il chantun haja pero dat ün per cas chi dan da stübgjar e chi mettan cun lur agir in dumonda la chatscha Grischuna...

Da stübgjar ha lura dat, in mincha cas a mai sco president e sco commember da la cumischiun chantunala da chatscha, l'artichel in la gasettina da chatscha da

december e schner da nos president chantunal. In quist voul el discusiunar sur da refuormas da nossa chatscha e fa dafatta propostas concretas. Las pretaisas in las medias cha quist saja gnü fingià discutà cun la basa e cha quella stetta davo sias expressiuns nu tuornan ed han fat star stut a bainquants presidents e commembers dal BKPJV. In mincha cas para sco scha no chatschaders lessan ignorar las decisiuns da la populaziun pro las ultimas elecziuns e metter in dumonda tuot il sistem actual da chatscha. Plü important füssa our da mia vista da stübgjar e discutir che e co chi's ha la pussibilità da sgürar nossa chatscha bassa. Quia vaina ün manco ed eschan flaivels per attachas cunter quella chatscha. Co esa pussibel d'argumentar la chatscha bassa? Daja perscrutaziuns chi muossan sü cha la chatscha d'utschels nun es la cuolpa per la diminuaziun da l'utschlamainta. In listess vala eir per la chatscha da leivras. Quist sun per mai temas chi'd es da discutir e na far gnir nar a tuot la populaziun ed als chatschaders cun dumondas schi füss melder da cumanzar la chatscha fingià in avuost ed ir fin aint pel october a chatscha o schi füss da dar liber il caliber, quai chi'd es gnü fingià discutà e dumandà avant ün per ons in ün questiunari cha mincha chatschader ha gnü la pussibilità da respuonder. In quel ha la chatschadriglia Grischuna cler e net confermà cha tant la chatscha sco eir il caliber saja bun uschè sco ch'el saja.

Tuot in tuot es quist stat ün on cun blera pizza e vals na be pel president e la suprastanza dimpersè per tuot ils commembers da la Lischana.

Ün sincer grazcha fich a tuots pel sustegn da nossa lavur a favur da la Lischana e da la chatscha Grischuna.

Vos president Mario

Vos president

Mario Duschèn